


TAJSA PRIZO PAL O ROMANO KULTURALO BARVALIPE 2021



O Tajsa Prizo pal o Romano Kulturalo Barvalipe sas putardo ando berš 2019 katar le Evropako Romano Instituto vaš Arte thaj Kultura (ERIAC). Lindos samate e bazutne principurja le ERIAC-eske, o Tajsa Prizo del pakiv jekhe romane dženeske/ dženjake save cirden pes andar o kulturalo barvalipe le romengo – barvaljarel i scena pal e romane arte thaj kultura thaj sa kadja, del forma thaj nevjarel e romane kulturalo ekspresie vaš i nevi generacia. O prizo del pes jekhe kreativno romane dženeske sar jekh andar e šerutne glasarja katar o romano kulturalo avdivesutno miškipe. O Tajsa Prizo si sasteste pokindo katar e Membrurja le ERIAC-eske vaš lenge membroško pokinipe. Kadaja buti mekel amen te pokinas kadala love palpale ki komuniteta dindos vast vaš o barjaripe jekhe bute džangle romane

profesionistosko ando domeno le artako thaj le kulturako. O dizajno katar o prizo sas kerdo katar o but prindžardo romano artisto Robert Gabris thaj del sar prindžaripe 5.000 evro. E anavjarimata katar o Tajsa Prizo ande kado berš sas bičhalde katar le ERIAC-eski komuniteta thaj nakhle opral 230 manuša thaj institucionalo membrurja. O džuro katar o Tajsa Prizo si kerdo andar le ERIAC-eski Barvalipe Akademia kaj si lan 15 influjento thaj internacionalo but prindžarde eksperturja andi arta thaj kultura roma thaj romnja opral sasti phuv. Von alosarde pandž finalisturja save si ande kompeticia vaš kadaja specioalo pakiv. Kadaja rjat, e membrurja katar i Barvalipe Akademia si te den avri o anav le dženesko kaj si te lel ando 2021 o Tajsa Prizo pal o Romano Kulturalo Barvalipe.

FINALISTURJA



ZITA MOLDOVAN
RUMUNIA

I Zita Moldovan si jekh andar e maj prindzarde aktrice andi Rumunia, džurnalistka thaj ko-fondatorka katar o angluno romano teatro andar i Rumunia - Giuvlipen Teatroski Kompania. Voj si vi dizainerica pal i moda kerel kolekcije inspirisarde andar o kulturalo barvalipe le romane hurjavimasko.



SELMA SELMAN
BOSNIA THAJ HERZEGOVINA

I Selma Selman si jekh romani artistka thaj aktivistka andar i Bosnia thaj Hercegovina. Laki buti sikavel e eforturja andar lako dživipe thaj vi andar lake komunitetako, sikavindos verver medie sar si o khelipe, i piktura, i fotografia thaj e video instalacie. I Selma si vi fondatorka katar i organizacia "Get The Heck To School" savjako cilo si te zorjarel le romane čhajen opral sasti phuv save si dine rigate katar i societeta thaj nakhen andar o čoripe.



MAŁGORZATA MİRGA-TAS
POLSKA

I Małgorzata Mirga-Tas si jekh polnikani-romani vizualo artistka, skulptorica, piktorka, edukatorka thaj aktivistka. Voj sas alosardi te reprezentisarel i Polska ko 59-to Veneciake Bienale; i angluni romani artistka kaj kerdja kodo. Voj si i fondatorka katar i JAW DIKH Fundacia, savi kerel artistikane thaj edukacionalo projekturja thaj anel romane artisturja ande Rezidenciako Programo andar i Czarna Gora, Polska.



SAMI MUSTAFA
KOSOVO/ FRANCA

O Sami Mustafa si jekh independento dokumentarurjengo direktoro thaj produktori biando ando Kosovo. Vov si jekh andar e fondatorja katar i Romawood produktiaki kompania. Vov putardjas o projekto Jekh Kham Jekh Sel (One Sun One Nation) ando 2007 thaj o but prindzardo Rolling Film Festival, savo kerel pes de andar o 2009. Vov si prindzardo pal pesko angluno filmo "Trapped by Law" (Astaro katar o Zakono) (2015, Kosovo/Germania). Vov si vi filmosko tutoro thaj mentoro vaš e romane terne kaj keren filmurja.



GEORGE VASILESCU
RUMUNIA

O George Mihai Vasilescu si jekh vizualo artisto andar i Rumunia. Sar vizualo artisto vov kerel buti verver tehnikenca sar si i piktura ando olio, printurja, skulptura ando bronzo, parno praho thaj ceramika thaj sa kadja, fotografia thaj video. Les sas les varesave personalo ekshibicie thaj sikavdjas peski buti ande grupurja andi sasti Evropa. E teme kaj anen leske intereso si o korkoripe, o bišajpe le kamimasko, i romani identiteta thaj i historia.

